

Vischnaunca da Breil

Regulativ dil vischinadi da Breil

1992

Art.	1	Territori
	2	Vischins, dretg da votar, elegibladad
	3	Organs
	4	Radunonza da vischinadi
	5	Funcziun dil(s) genau(s)
	6	La cumissiun da gestiun
	7	La cumissiun da vischinadi
	8	Pasculaziun cumina
	9	Recuors
	10	Finanzas
	11	Demissiuns/elecziuns
	12	Determinaziuns finalas

Art. 1
Territori Il vischinadi da Breil-vitg sco fracziun politica dalla vischnaunca da Breil cumpeggia il territori e la singula fracziun dil vitg da Breil (Art. 80 dalla costituziun da vischnaunca).

Art. 2
Vischins, dretg da votar, elegibladad Vischins ein tuttas personas, senza differenza da naziunalitad e dretg da burgheis, che habiteschan el vischinadi da Breil-vitg e ch'ei registradas ella controlla da habitonts dalla vischnaunca da Breil.
Il dretg da votar e d'elegibladad sedrezza suenter la costituziun da vischnaunca Art. 7/Art.8 ed Art.9

Art. 3
Organs Ils organs dil vischinadi ein:

1. La radunonza da vischinadi
2. La cumissiun da vischinadi
3. Ils commembers en suprastonza dalla vischnaunca politica
4. La cumissiun da gestiun

Art. 4
Radunonza da vischinadi Il gerau convochescha las radunonzas da vischinadi, numnadamein:

1. *La radunonza da rendaquen e propostas per elecziuns*
Quella ha liug mintga 3 onns avon las elecziuns dils officials communalas. Ella prepara las propostas per las elecziuns communalas tenor art. 12 e 14 dalla costituziun da vischnaunca ed art. 11 da quest regulativ.
Plinavon pren ella enconuschientscha dil quen da vischinadi ed approbescha tal.
2. *Radunonzas extraordinarias*
 - a) Sch'il gerau anfla per necessari.
 - b) Sche 30 votantas ni votants giavischan quei. Ina tala pretenziun sto daventar en scret ed esser motivada.
 - c) Sche J dils cussegliers dil cussegl da vischnaunca ord la fracziun da Breil-vitg giavischan quei. Ina tala pretenziun sto daventar en scret ed esser motivada.

Las tractandas previdas ein da publicar silmeins 3 dis avon la radunonza sin tabla da publicaziuns ni el Fegl official dalla Surselva (FUS).

La radunonza convocada a temps sa prender valeivlamein conclus dalla tractandas publicadas. En votaziuns vala il relativ pli. Tier ulivada dallas parts vegn la tractanda suspendida suenter la secunda votaziun.

Tier elecziuns duei en principi vegnir scrutinau, aschinavon ch'il diember da candidats survarga il quorum dils mandats ch'ei d'eleger ni proponer.

Da mintga radunonza da vischinadi ei da menar in protocol entras in commember dalla cumissiun. Il protocol vegn prelegius tier la proxima radunonza.

Art. 5
Il(s) gerau(s) ei(n) il(s) representant(s) dil vischinadi en suprastonza communalas. Secund relaziun surpren in gerau il presidi e l'alter igl actuariat. Sper las obligaziuns ordinarias tenor uorden communal ha(n) el(s) suandont pensum:

- a) convocar e presidiar las radunonzas da vischinadi e dalla cumissiun
- b) render rapport davart l'activitad el vischinadi
- c) haver quitau dallas pastiras da casa e sendas
- d) administrar la facultad liquida ed eventual schischom ni ulteriura proprietad dil vischinadi
- e) procurar il quitau ed administaziun dil mobiliar dalla halla da scola Breil-vitg
- f) l'ulteriura lavur che sedamonda per in bien e real uorden en vischinadi.

Art. 6
Il revisur da quen communal ord il vischinadi da Breil-vitg ei medemamein revisur da quen pil fatg dil vischinadi. Sper siu pensum da revisur cooperescha el cun la cumissiun da vischinadi tier la preparaziun dallas propostas per las elecziuns dils officials communalas.

Art. 7
La cumissiun da vischinadi cun l'excepziun dils commembers ex officio vegn mintgamai elegida per treis onns a caschun dalla ra-

dunonza da vischinadi. Ella consista ord ils commembers da suprastanza ord la fracziun da Breil-vitg, dil revisur da quen communal ord il vitg da Breil e da *minimum dus* ulteriurs commembers.

1. Pensum dalla cumissiun

- a) Cussegljar ils commembers dalla suprastanza communal e damondas che pertuccan expressivamein il vischinadi e ses interess.
- b) Preparar las propostas per mauns dalla radunonza dil vischinadi per:
 - ils commembers dalla cumissiun da vischinadi
 - ils officials da vischnaunca
 - ils commembers da differentas cumissiuns e delegai en gremis communal e regional per mauns dalla suprastanza communal.
- c) In commember dalla cumissiun da vischinadi surpren l'incarica per l'administraziun, controlla e quitau digl inventari e mobilier en halla da scola Breil.
- d) In commember surpren l'incarica per la redacziun dils protocols dallas sedutas da cumissiun e radunonzas da vischinadi. En cass ch'il vischinadi ha dus geraus surpren in il presidi dalla cumissiun e l'auter igl actuariat.

2. Cumpetenzas dalla cumissiun

La cumissiun ha la cumpetenzza d'in credit annual da francs 1000.– per intents spezifics dil vischinadi.

Art. 8

Entras la decisiun dalla votaziun a caschun dalla radunonza da vischinadi dils 20 da mars 1992, ei la pasculaziun cumina sin teritori dil vischinadi da Breil-vitg serrada per tuttas categorias d'animals e quei per igl entir onn.

Ord quella consequenza croda il regulativ da pasculaziun e frietaziun dil funs da casa e cuolms da Breil per la fracziun da Breil-vitg dils 21 d'avrel 1982 ord vigur.

Art. 9

Decisiuns dalla cumissiun da vischinadi san vegnir contestadas cun recuors alla suprastanza communal.

Pasculaziun
cumina

Recuors

Art. 10

1. Contribuziuns da vischins

Finanzas

Per cuvierer ils cuosts currentes ed eventualas contribuziuns extraordinarias pigl interess dil vischinadi sa la cumissiun proponer alla radunonza generala dil vischinadi ina taxa annuala, ch'ei d'imponer sin basa dils habitonts.

2. Incasso da contribuziuns

Igl incasso dallas taxas sa sin giavisch vegnir procuraus entras la canzlia communal.

3. Rendaquen cassa vischinadi

Il genau meina il cudisch da casa, il qual ei mintga treis onns da reveder entras il revisur da quen e d'approbar entras la radunonza generala dil vischnadi.

4. Rendaquen cassa mobiliar halla

In commember dalla cumissiun dil vischinadi meina medemamein quen dil mobiliar e rapportescha sche pusseivel mintga onn, en scadin cass denton mintga treis onns, sur entradas, expensas e status dil deivet ni dalla facultad. Tal quen ei medemamein da reveder entras il revisur ensemen cun in dils ulteriurs commembers dalla cumissiun. Il commember che surpren la survigilonza dil mobiliar e l'administraziun da quei conto ei responsabels ch'il deivet surprius entras il vischinadi vegni amortisau annualme in ina rama comensurada.

Ulteriurs detagls sur dalla funcziun ein prescrets el regulativ per igl inventari dalla halla da Breil-vitg.

Art. 11

1. Demissiuns ed elecziuns dils officials da vischinadi

Demissiuns/
elecziuns

a) Demissiuns

Las demissiuns dils officials dil vischinadi ein da far a scret entochen ils 28 da fevrer per mauns dil genau en uffeci.

b) Elecziuns

Las elecziuns dils officials dil vischinadi vegnan fatgas a caschun dalla radunonza da rendaquen la quala croda mintga 3 onns. Ein pliras propostas per in post avon maun succeda l'elecziun cun scrutini.

Il vischinadi ha d'eleger ils suandonts organs:

– ils commembers (min. dus) dalla cumissiun da vischinadi

2. Demissiuns e propostas d'elecziuns pils officials communalas

a) Demissiuns

La demissiun d'in uffeci communal ni d'ina scharscha en ina cumissiun communal ein da far a scret alla suprastanza sil pli tard entochen ils 28 da fevrer digl onn d'elecziuns. Las demissiuns vegnan publicadas dalla suprastanza communal el Fegl official. La demissiun digl uffeci da genau ei da far el medem temps al revisur da quen dil vischinadi.

b) Elecziuns communalas

Entochen ils 30 d'avrel ha il vischinadi d'inoltrar alla canzlia communal la gliesta dils candidats tenor art. 12 dalla constituziun da vischnaunca.

La cumissiun da vischinadi prepara per las scharschas communalas las propostas per candidats sin la radunonza da vischinadi.

Ulteriuras propostas per mauns dalla cumissiun san vegnir fatgas entochen 15 dis suenter che la publicaziun officiala dallas demissiuns ei fatga el Fegl official. Las propostas ein d'inoltar a scret al genau (president dalla cumissiun da vischinadi). Ellas ston cuntener il num dil proponider.

Propostas valeivlas san mo vischinas e vischins cul dretg da votar e sesents en nies vischinadi far.

Il proponider sto saver confirmar ch'il proponiu stetti sin posta per la candidatura.

Las propostas existentas ein da far enconuscent allas vischinas e vischins silmeins 8 dis avon che la radunonza da vischinadi ha liug (FUS).

A caschun dalla radunonza da vischinadi stat ei liber als vischins da far propostas per ulteriurs candidats.

Ils proponi en radunonza da vischinadi ston esser presents alla radunonza ni perstgisai e confirmar lur veglia da star a disposiziun per ina candidatura.

La radunonza da vischinadi ei il davos termin per far propostas che san aunc vegnir sin gliesta officiala dils candidats.

L'elecziun dils officials da vischnaunca sedrezza tenor nosa vertenta constituziun communal, approbada dil pievel

ils 24 d'october 1999 che vala sco muossavia e cumpendi per las elecziuns communalas.

Croda in candidat per president, genau ni cumissiun da gestiun ord l'elecziun, sa el sin siu giavisch ch'ei d'exprimer sil pli tard a caschun dalla radunonza da vischinadi vegnir nominaus sco candidat per il cussegl da vischnaunca.

Per commembers da cumissiuns e delegai en differents gremis communalas e regionalas ord nies vischinadi, ils quals il cussegl da vischnaunca ei cumpetents d'eleger, san la cumissun e la radunonza da vischinadi far concretas propostas per mauns dalla suprastanza communal.

Art. 12

Questa constituziun e regulativ dil vischinadi da Breil-vitg passa en vigur cun l'approbaziun entras la radunonza dil vischinadi e cul conclus d'approbaziun dil cussegl da vischnaunca. Determinaziuns finalas

Ella annullescha il regulativ da vischinadi dils 14 da fevrer 1991 ed il regulativ da pasculaziun e frietaziun dil vischinadi dils 21 d'avrel 1982. Sura regulativ ei vegnius prelegius ed approbaus en la radunonza dil vischinadi dils 26 d'avrel 1992.

Breil, ils 05 d'avrel 1992 **En num dalla cumissiun da vischinadi**

Il genau: Pieder Seiler

Breil, ils 29 d'avrel 1992 **En num dala suprastanza communal**

Il president: Sep Cathomas

Igl actuar: Fridolin Cahenzli

Il cussegl da vischnaunca ha priu enconuschientscha ed approbau questa constituziun e regulativ dil vischinadi da Breil-vitg en la seduta dils 25 da matg 1992.

Breil, ils 25 da matg 1992 **En num dil cussegl da vischnaunca**

Il president: Tarcisi Livers

Il vicepresidente: G. G. Cabernard